

KOREKTIVNA PRETPLATA

Alkalaj ukinuo kolektivnu pretplatu MIP-a na "Avaz" i "Nezavisne novine"

Konkretnu podršku akciji "marka za Avaz - marka protiv BiH" dalo je i Ministarstvo vanjskih poslova BiH. Šef ministarstva **Sven Alkalaj** naredio je da se smanji pretplata na Avaz s 25 na samo 1 primjerak dnevno, a ta naredba odnosi se i na "sve ostale dnevne listove". Ali, kako smo doznali, restriktivna odluka ministra Alkalaja ne odnosi se na "sve ostale dnevne listove", kako stoji u službenom obrazloženju odluke, nego samo na dvoje privilegirane dnevne novine - Avaz i *Nezavisne novine* - budući da kolektivna pretplata na ostale dnevne novine uopće nije ukinuta. Jer nije ni postojala! (M. A.)



Sven Alkalaj

KRAJIŠKI SLUČAJ "INDEX"

Seks afere i nepotizam na Pedagoškom fakultetu u Bihaću



NEDJELO NA VIDJELO

Studenti Pedagoškog fakulteta u Bihaću progovorili o grijesima bivšeg dekana Rize Džafića

Iako od novembra prošle godine, nakon isteka dvogodišnjeg mandata više nije dekan, profesor **Rizo Džafić** još uvijek je navodno "alfa i omega" na Pedagoškom fakultetu u Bihaću. Tokom mandata u Dekanatu, sudeći po strukturi nastavnog osoblja, dobro se pobrinuo da ubuduće bude okružen samo osobama od povjerenja. Nije doduše jedini koji je na Bihaćkom univerzitetu "ugađao" djeci poznatih krajiških porodica, ali je samo Džafić, navodno, do sada za angažman na Pedagoškom fakultetu "preporučio" nekoliko uposlenika, redom iz poznatih krajiških porodica. Mladom asistentu **Samiru Veladžiću** je dao "odlične preporuke" za mjesto asistenta a njegovog prezimenjaka **Amira** "preporučio" za referenta u Studentskoj službi. Obojica su bratiji jednog od SDA-ovih prvaka u Krajini, aktuelnog federalnog poslanika **Edhama Veladžića**. Džafić je, međutim, za razliku od nekih svojih kolega koji su dobre pozicije na Univerzitetu sticali uslugama političkim moćnicima, otišao i korak dalje. Tako je za asistentice na predmetima koje predaje, angažirao svoju kćer i snahu!? Džafićeva kći na Fakultetu koristi samo suprugovo prezime **Pečenковиć**, ali je

općepoznato da je **Vildana** sa Džafićem u najbližem srodstvu. Mladu **Šeherzadu Halkić** je na Pedagoškom fakultetu odmah nakon diplome 2008. godine čekalo mjesto asistentice i to baš asistentice na predmetu koji predaje njen svekar Džafić. Na vratima njenog kabineta je, međutim, navedeno samo djevojačko prezime, Halkić. Navodno u Bihaću javnost više i ne reagira na nepotizam pri zapošljavanju na Univerzitetu a tek nešto više pozornosti je izazvala nedavna afera profesora **Đorđa Slavnića** iz Banje Luke. Slavnić navodno bje glas profesora sklonog ucjenama, posebno zgodnih studentica, ali je nedavno zbog pritužbi nekolicine roditelja studenata sam dao otkaz. Slučaj je procurio van zidova Fakulteta tek kada je jedna od lascivnih e-mail poruka koju je slao studenticama osvanula na bihaćkom portalu biscani.net. Slavnić nije čekao sankcije uprave fakulteta pa je sam otkazao ugovor sa Fakultetom, međutim, bivši dekan Džafić ga je na svoju ruku ponovo angažirao. Zanimljivo, baš u vrijeme kada je Džafićeva kći Vildana u Banjoj Luci magistrirala i to uz mentorstvo profesora Slavnića!

(N. Šunj)